



Broj
75

RUDAR

Mart 2016. • List RMU "BANOVIĆI"
BESPLATAN PRIMJERAK

**NESREĆA
U JAMI
»OMAZIĆI«**



**POSJETA FEDERALNOG MINISTRA
ENERGETIKE, INDUSTRIJE I RUDARSTVA
NERMINA DŽINDIĆA**



PROIZVODNJA
**POČETAK GODINE OBILJEŽEN
PREBAČAJEM NA PROIZVODNJI
UGLJA I OTKRIVKE**



TERMOELEKTRANA BANOVIĆI
**KREĆU PRIPREMNI RADOVI NA
LOKACIJI PREDVIĐENOJ
ZA GRADNJU TERMOELEKTRANE**



NESREĆA U JAMI „OMAZIĆI“ - ZASTAVE NA POLA KOPLJA,
TUGA I NEVJERICA U RMU „BANOVIĆI“

IZGUBILI SMO SINA, BRATA, OCA, MLADOG RADNIKA

U nesreći koja se dogodila u jami „Omazići“ rudnika „Banovići“ uslijed obrušavanja stropa smrtno je stradao komorant Nermin Šehić. Zbog toga će 10. mart ostati upisan crnim slovima u historiju banovićkog Rudnika.

Deset komoranta pripremalo je prostoriju za mehanizovano široko čelo, kada se negdje oko 11:30 sati strop dužine 10 metara počeo obrušavati. Vidjevši da prijete opasnost od obrušavanja devetorica rudara izašli su iz rudarske prostorije, dok je Nermin koji je upravljao kombajnom ostao da isključi mašinu misleći da ima dovoljno vremena. Nažalost nije bilo tako, dijelio ga je samo jedan korak od izlaza.

Vijest o tragediji koja je pogodila banovićki rudnik brzo se proširila. Po saznanju za nesreću odmah su reagovali pripadnici Čete za

spašavanje, koji su u rekordnom vremenu sišli u jamu i nadljudskim naporima počeli sa otkopavanjem odrona.

Od tada pa sve do večernjih sati trajala je akcija spašavanja, da bi oko 20:30h iz zatrpene rudarske prostorije izvučeno tijelo stradalog rudara.

Glavni federalni rudarski inspektor Nuraga Duranović po dobijanju informacije izašao je na teren i započeo istragu. Dan nakon nesreće i provedenih istražnih postupaka obratio se i medijima.

- Razgovarali smo sa radnicima koji su radili na tom mjestu u trenutku kada se desila nesreća. Treba složiti sve izjave, pregledati mjesto nesreće i dokumentaciju za analizu, nakon toga ćemo znati više, u suprotnom ne bih želio da prejudiciram zaključke. Daljnjim aktivnostima rasvijetlit ćemo ovaj

dogadjaj i utvrditi uzroke nesreće – istakao je Duranović.

Rudnik je opremljen najsavremenijom opremom i veoma značajna sredstva uložena su u primjenu sigurnosnih mjera, dokaz je unaprijeđenje podzemne i u površinske eksploatacije uvođenjem najmodernije tehnologije. Međutim, nesreće se dešavaju. Najbolje to znaju rudari koji svaki dan silaze u utrobu zemlje.

Prerano gašenje jednog života neizmerna je tuga i veliki gubitak, ali porodica stradalog rudara neće ostati nezbrinuta. Naime, kao što je i ranije bio slučaj, rukovodstvo Rudnika poduzelo je odgovarajuće mjere pomoći porodici. Potvrdio je to i izvršni direktor za tehničke poslove dr. Ibrahim Lapandić.

- Imamo obavezu prema porodici našeg rahmetli kolege i važno je da reagiramo na vrijeme – istakao je Lapandić.

Duboko žaljenje i saučešće porodici uputio je i direktor rudnika dr. Munever Čeragić, navodeći da je to nemjerljiv gubitak za porodicu, ali i za Rudnik, te da će Uprava učiniti sve

što je u njihovoj moći da na adekvatan način zbrine porodicu poginulog rudara.

- Porodici ćemo maksimalno izaći u susret. Jasno je da je nemoguće nadoknaditi njegovo odsustvo, ali ćemo nastojati obezbjediti im egzistenciju. Zaposlit ćemo suprugu i učiniti sve da im olakšamo život.

Banovići su rudarsko mjesto, mjesto u kojem svaka porodica ima barem po jednog rudara, i svi su svjesni teških uslova rada i mogućnosti ovakvih ishoda.

Prilikom izrazi žaljenje porodici stradalog i svim rudarskim porodicama iskoristio je i predsjednik Samostalnog sindikata rudara FBiH dr. Safer Mušanović.

- Rudarstvo je teško i nepredvidivo zanimanje, a imajući u vidu da ova sredina živi od Rudnika, građani Banovića duboko su ražalošćeni zbog Šehićevog stradanja. Naravno, najteže je njegovoj porodici. Izgubili smo stručnog i

vrijednog rudara – izjavio je Mušanović.

Pogibija Nermina Šehića posebno je pogodila njegovu porodicu, kolege ali i sve građane Banovića. Na dan dženaze na području općine Banovići proglašen je dan žalosti. Zastave spuštene na pola koplja, kiša i sablasna tišina jedino je što se moglo vidjeti i osjetiti. Posljednje hvala velikom čovjeku, radniku, ocu i suprugu uputilo je oko 2.000 ljudi okupljenih ispred njegove kuće. Tabut su donijeli njegovi komorati obučeni u svoja rudarska odijela. Od Nermina su se oprostili članovi njegove porodice, kolege, predstavnici Rudnika, politički predstavnici, te brojni sugrađani. Dženaza je klanjana na mjesnom mezarju Dijaci.



FEDERALNI MINISTAR ENERGETIKE, INDUSTRIJE I RUDARSTVA NERMIN DŽINDIĆ: RUDNIK „BANOVIĆI“ JE ŠKOLSKI PRIMJER RADA I RAZVOJA JEDNOG PREDUZEĆA

Novoimenovani ministar energije, industrije i rudarstva Nermin Džindić boravio je u prvoj službenoj posjeti rudniku „Banovići“, gdje je u upravnoj zgradi Rudnika održao sastanak sa članovima Uprave i njihovim najbližim saradnicima. Sastanku su prisustvovali predstavnici Elektroprivrede; izvršni direktor za strateške i kapitalne investicije Senad Salkić i direktor za proizvodnju Nevad Ikanović, te direktor rudnika „Đurđevik“ Samir Hadžić.

Na početku izlaganja ministar je uporedio stanje u dva rudnika, odnosno negativno stanje u RMU „Đurđevik“ i pozitivno stanje poslovanja u RMU „Banovići“, naglasivši da u rudniku „Banovići“ stvari već godinama idu kako je zacrtano i odgovaraju svim planovima i procedurama koje treba poštovati.

– Za razliku od sastanka u Đurđeviku gdje smo oštrije razgovarali, dali upute i zaduženja, ovdje smo došli samo pružiti podršku rukovodstvu na putu kojim su krenuli, odnosno dati apsolutnu podršku projektima Termoelektrane i Cementare – rekao je gospodin Džindić.

Tokom razgovora bilo je riječi i o temama vezanim za poljuljano tržište energije, gdje je ministar upozorio na konstantan pad cijena ovog energenta, te naglasio da se o tome mora posebno voditi računa, ali da to nikako ne smije biti prepreka zacrtanim Strateškim projektima. Prema riječima ministra ova situacija je privremena i ulažu se maksimalni naponi za iznalazjenje adekvatnih rješenja.

Ovom prilikom obratio se i direktor rudnika „Banovići“ dr. Munever Čerčić, koji je upoznao prisutne o trenutnoj situaciji u firmi, aktivnostima i mogućnostima unaprijeđenja rada, navodeći da se u 2016. godinu krenulo vrlo odlučno i pragmatično. Akcenat je stavljen na velike Strateške projekte izgradnje Termoelektrane i Cementare u Banovićima.

– Naš uspjeh počeo je nakon odvajanja od rudnika „Kreka“. Iako su nam u to vrijeme prognozirali lošu budućnost, pokazali smo suprotno. Od tada pa do danas odradili smo veliki posao zahvaljujući prije svega pravovremenim odlukama i investicijama. Od 2004. godine povećali smo kapacitet proizvodnje sa 1,3 miliona na 1,55 miliona tona separisanog uglja, u nastavku modernizovali i izmijenili mehanizaciju na površinskoj eksploataciji, te nabavili mehanizovano široko čelo u jami. Velika investiranja planiramo i u narednom periodu, kako bi do 2020. godine mogli osigurati veću proizvodnju uglja – istakao je Čerčić.

Na sastanku se razgovaralo prije svega o bitnosti projekata izgradnje Termoelektrane i Cementare, konstatujući da to nisu samo projekti Banovića nego cijele države, koja zavisi isključivo od energetskog sektora. I upravo zbog toga naglašena je bitnost učestvovanja svih onih koji mogu pomoći da se projekti realizuju u što kraćem roku, da se garancije dobiju na vrijeme, a potom krene i u realizaciju.

Prema riječima ministra rudnik „Banovići“ je školski primjer rada i razvoja preduzeća, gdje jedan čovjek zna sve činjenice, podatke i hronologiju cijelog preduzeća i dok je takav pristup radu, uspjeh sigurno neće izostati. Mišljenja je da ovakvih lidera itekako nedostaje privredi BiH.



INTERVJU: dr. MUNEVER ČERGIĆ, DIREKTOR RUDNIKA „BANOVIĆI“

U PROŠLOJ GODINI NAPRAVILI SMO KRUPNE ISKORAKE, U OVOJ NAS ČEKA JOŠ MNOGO OZBILJNIH ZADATAKA



Intenziviranje aktivnosti oko izgradnje Termoelektrane i pratećih projekata, te ostvareni proizvodni rezultati na početku godine, bili su dobar razlog da razgovaramo sa direktorom Rudnika dr. Muneverom Čerčićem. U razgovoru smo se dotakli i poslovanja u prošloj godini.

Možete li za početak rezimirati ukupne proizvodne i poslovne rezultate u prošloj godini?

- Izrada završnog računa je pri kraju i još uvijek nemamo zvanične podatke o poslovanju preduzeća u 2015. godini, ali po našim procjenama finansijski rezultat će biti pozitivan i to oko 600.000 KM. U odnosu na 2014. godinu zarada je manja, ali je realizacija uglja i otkrivke u ovoj godini veća, odnosno iznosi oko 95%. Doprinos ovakvim rezultatima dala je angažovanost uposlenih, raspoloživost mehanizacije, te stalna investiranja. Nabavljena su četiri damper kamiona u vrijednosti od oko 9 miliona KM, kao i druga oprema za površinsku i podzemnu eksploataciju, u konačnici se investiralo oko 14 miliona KM. Bitno je napomenuti da smo tokom 2015. godine zaposlili 236 novih radnika. Tako da sada imamo oko 2.900 zaposlenih. Nakon sumiranja rezultata i poduhvata u prošloj godini mogu reći da sam zadovoljan postignutim, mnogo se radilo i maksimalno zalagalo. Stvorili smo pogodno tlo za ono što nas čeka u ovoj godini, odnosno početak izgradnje Termoelektrane i Cementare u Banovićima.

Nova godina je počela sa prebačajima na proizvodnji uglja i otkrivke. Da li su to naznake da će u ovoj godini biti ispunjeni zacrtani planovi?

- Kada je riječ o 2016. godini tokom prva dva mjeseca zabilježen je prebačaj i na proizvodnji uglja i na proizvodnji otkrivke, iste rezultate očekujemo i u mjesecu martu. Procjena je da ćemo do kraja godine imati ispunjen plan, ukoliko nam tehničko – tehnološki i vremenski uslovi dozvole. Već smo započeli aktivnosti oko investiranja u podzemnu eksploataciju, odnosno nabavku jednog kombajna i 4-5 grabuljara, te isto toliko transportnih sistema za potrebe stvaranja pripremnih prostorija za 2018. godinu, kada imamo u planu nabaviti još jedno mehanizovano široko čelo.

Prošle godine okončani su postupci ključni za početak izgradnje Termoelektrane. Šta je ono na čemu se trenutno radi i dokle se došlo sa aktivnostima na realizaciji projekata?

- Ministarstvo finansija u Vladi FBiH ovih dana razmatra prijedlog izmjene i dopune Zakona o izdavanju garancija. Računamo da bi mogli za dva mjeseca da nam obezbijede potrebnu garanciju. Trenutno se vrši priprema aplikacije za banku, koju bi trebali predati krajem marta. Nakon toga ostaje da se potpiše ugovor sa bankom, a potom slijede pripremi radovi, dobijanje građevinske dozvole, te projektovanje. Početak gradnje Termoelektrane predviđa se u mjesecu septembru ove godine. Podsjećam da je prethodno potpisan ugovor o izvođenju radova i nabavci opreme u iznosu od 405 miliona eura, ali računajući i dodatne troškove carine, PDV-a, kamate, investicija će biti vrijedna oko milijardu konvertibilnih maraka. Moram naglasiti da su u toku radovi i na realizaciji projekta izgradnje Cementare. Prije nekoliko dana Uprava je donijela odluku o pokretanju investicije prema Nadzornom odboru, Vladi FBiH i resornom ministarstvu. Da li će i Cementara biti od strateškog interesa za Federaciju znat će se kada Vlada da svoj konačan sud. Projekat je po predračunu vrijedan negdje oko 250 miliona eura, ali ispitivanjem tržišta došli smo do saznanja da je to moguće uraditi za oko 200 miliona eura. Ako polovinom godine budemo imali tu saglasnost, do kraja godine bi raspisali tender, a već iduće bi trebali imati obezbijeđen ugovor. Radovi bi mogli početi krajem iduće godine, a do 2020. godine u funkciji bi trebale biti Termoelektrana i Cementara u Banovićima.

Mnogo se radilo i razgovaralo o nabavci transportnog sistema. Kada se očekuje raspisivanje tendera?

Aktivnosti na nabavci transportnog sistema već su započele, a investicija će se kretati oko 40 miliona KM. Ono što nam slijedi je raspisivanje tendera, koji bi se trebao okončati u ovoj godini, a već do kraja naredne godine transportni sistem bi mogao biti u funkciji. Moram napomenuti da mi imamo transportni sistem još od 1990. godine i ovih dana ćemo uz pomoć stručnjaka ocijeniti njegovu iskoristivost, odnosno koje dijelove možemo koristiti za novi transportni sistem.

Osnovni cilj svih aktivnosti je nastavak trenda dobrog poslovanja, očuvanje radnih mjesta i dovoljna opskrba ugljem. Potrebna su stalna investiranja i ulaganja ukoliko se želi do 2019. godine, odnosno 2020. godine povećati proizvodnja uglja na 2.5 miliona tona, koliko je potrebno za termoelektranu Banovići i Tuzla, te široku potrošnju. U te svrhe do 2019. godine planirano je uložiti više od 120 miliona KM.

- Mi se oslanjamo na lokalne resurse i imamo jasnu viziju onoga što želimo postići. Do sada nam je išlo od ruke, a nadam se da će uz našu snagu i volju tako biti i u buduću. S razlogom očekujemo susretljivost Kantonalne i Federalne vlasti, jer treba imati na umu da gradimo nešto što će biti korisno za sve – na kraju razgovora dodao je dr. Čerčić.

PROIZVODNJA UGLJA I OTKRIVKE

U PRVA DVA MJESECA PREBAČENI PLANOVI, MART NASTAVLJEN ISTIM TEMPOM

Ostvarena proizvodnja uglja i otkrivke u prethodnoj godini iznosila je 95,13% na uglju, odnosno 88,87% na otkrivci. Ispunjenu mjesečnih planova ispriječio se nedostatak pomoćne mehanizacije, zastarjele mašine, remontu na Separaciji i povremeno kašnjenje nabavke rezervnih dijelova. Radovi su se odvijali u otežanim uslovima sve do mjeseca oktobra kada se proizvodnja počela vraćati na pravi kurs. I pored teških uslova rada zaostatak se uspio nadoknaditi. Godina je završena sa oko 600.000 KM dobiti, što govori da su još jednom ispunjeni ambiciozni planovi preduzeća.

Ove godine stvari se odvijaju u korist Rudnika. Proizvodnja na uglju i otkrivci znatno je naprednija u odnosu na prošlu godinu, zahvaljujući nabavci pomoćne mehanizacije i vrlo povoljnim uslovima rada na kopovima.

Januar je završen sa proizvodnjom na otkrivci u iznosu od 961.820

metara kubnih čvrste mase, odnosno plan je prebačan za oko 13%. Pozitivni rezultati zabilježeni su i na proizvodnji uglja, gdje se išlo 2% preko plana, odnosno proizvedeno je 133.200 tona separisanog uglja. Posebno raduju rezultati na otkrivci i ukoliko se nastave zasigurno se može reći da problema u proizvodnji uglja neće biti, da će se ispuniti kako proizvodni planovi tako i oni vezani za plasman, što će u konačnici donijeti pozitivan finansijski rezultat.

Uslovi rada dobro su iskorišteni i u mjesecu februaru kada je proizvedeno 130.995 tona separisanog uglja, odnosno 101,24% u odnosu na plan, dok je prebačaj od 27% zabilježen na proizvodnji otkrivke. Tendencija rasta otkrivke nastaviti će se i u narednim mjesecima, tako da je već sada izvjesno da će rezultati do kraja godine zadovoljiti planirane količine.

Da će i u mjesecu martu proizvodnja uglja i otkrivke ići



planiranim tokom potvrdio je izvršni direktor za tehničke poslove dr. Ibrahim Lapandić.

- Od početka godine idemo dobro sa proizvodnjom uglja i otkrivke, mjesečni planovi pokazuju da sustižemo zacrtane ciljeve, pa čak idemo iznad planiranih, što se posebno odnosi za proizvodnju otkrivke. I u mjesecu martu krenuli smo ambiciozno i svi dosadašnji pokazatelji ukazuju na to da ćemo proizvesti 123.000 tona uglja i ostvariti 949.000 metara kubnih otkrivke. Objektivno mislim da možemo ispuniti planiranu proizvodnju na godišnjem nivou, prije svega – mišljenja je Lapandić. Za dobre rezultate zaslužena je pojačana i ispravna pomoćna mehanizacija, na čijem se pribavljanju konstantno radi. Dokaz tome je i nedavno nabavljeni buldozer Liebherr, koji je na kopove Rudnika stigao sredinom januara. Velika ulaganja planirana su i tokom ove godine.



TERMoeLEKTRANA BANOVIĆI

**KREĆU PRIPREMNI RADOVI NA LOKACIJI
PREDVIĐENOJ ZA GRADNJU TERMoeLEKTRANE**


U februaru 2008. godine počele su prve aktivnosti na realizaciji projekta izgradnje Termoelektrane, kada je Nadzorni odbor donio prvu Odluku o usvajanju elaborata pod nazivom „Osnovni koncept dugoročnog razvoja RMU „Banovići“ kao integralnog energetskeg objekta RiTE Banovići“, pa sve do danas kada se priprema dokumentacija neophodna za potpisivanje Ugovora o finansiranju. To je pozicija sa koje se više ne može nazad. Termoelektrana se gradi u Banovićima. Više to nije samo potreba, nego i realnost.

Zvanična aplikacija za finansiranje projekta krajem marta biti će upućena banci na razmatranje, a tokom ljeta očekuje se potpisivanje Ugovora o finansiranju. Poslije završetka procedura vezanih za saradnju između banke i Rudnika Vlada FBiH izdat će garanciju za kreditno zaduženje, kojom će se omogućiti znatno povoljniji uslovi zaduženja.

To je preduslov da u septembru ove godine počnu radovi na projektu vrijednom milijardu KM. Optimistični su i podaci da će pripremni radovi na lokaciji predviđenoj za gradnju Termoelektrane

krenuti za nekoliko mjeseci, odnosno uredit će se pristupni putevi, izmjestiti postojeća linija dalekovoda, nivelacija terena, te postaviti ograde i rasvjete.

Po svim pokazateljima naredni period označit će prekretnicu za Rudnik, za Općinu, ali i za cijelu državu. Puštanjem u rad Termoelektrane, te čitavog popratnog kompleksa osigurat će se značajan privredni razvoji i ulazak u savremenu eru energetskeg sektora.

**TVORNICA CEMENTA BANOVIĆI**

Mega projekat izgradnje Termoelektrane u Banovićima otvorio je mogućnost realizacije i drugih planiranih projekata. Jedan od njih je Cementara. Naime, u roku od mjesec dana očekuje se izjašnjenje Vlade FBiH o statusu projekta izgradnje Tvornice cementa u općini Banovići, što će ujedno odrediti i pravac izrade tenderske dokumentacije. U slučaju da se Vlada FBiH izjasni da je projekat od državnog interesa tenderska procedura bit će ista kao i za projekat izgradnje Termoelektrane.

U međuvremenu Stručna komisija radi na prikupljanju potrebne dokumentacije, saglasnosti i dozvola za realizaciju ovog projekta i trenutno se čeka urbanistička saglasnost, a njenim dobijanjem zatvorit će se jedan ciklus, te krenuti u izradu tenderske dokumentacije projekta u vrijednosti oko 200 miliona eura.

Iako su aktivnosti na projektu Termoelektrane poodmakle, nadležni smatraju da bi realizacija projekta izgradnje Cementare mogla krenuti odmah nakon početka gradnje Termoelektrane.

- Nije riječ samo o jednom projektu, nego kompleksu koji će upotpuniti sliku preduzeća. Stvorene su realne mogućnosti da 2020. godine Banovići imaju u funkciji Termoelektranu, Cementaru i kamenolom – naveo je

predsjednik Stručne komisije za praćenje i izgradnju projekta Termoelektrane i Tvornice cementa Avdija Mumić.



Kakve su mogućnosti za ovakav poduhvat i koliko su zaista realne dokazuje i pokretanje aktivnosti na otvaranju Kamenoloma nadomak Turije. U toku je priprema projektne i tenderske dokumentacije, a sa realizacijom bi se moglo krenuti odmah nakon završetka procedure unošenja u prostorni plan Općine. Ovo je dokaz da banovićki vrijedni rudari zajedno sa sposobnim i ambicioznim rukovodstvom Rudnika mogu izgraditi perspektivnu industrijsku sredinu.



ELZINA PIRIĆ, ŠEFICA SLUŽBE UNUTRAŠNJE ZAŠTITE RUDNIKA

PREDANOST KAO TEMELJ POSLOVNOG NAPRETKA

Iako je pomak vidljiv još uvijek su potrebni veliki koraci u stvarnom postizanju ravnopravnosti žena u društvu, posebno u poslovnim vodama. I baš iz razloga što je u poslovni uspijeh žene uložno više energije, truda i rada važno ga je posebno istaknuti. Primjer uspješne žene imamo i u našem preduzeću. Žena koja čvrsto drži kontrolu i odgovorno obavlja posao na više razina je Elzina Pirć, šefica Službe unutrašnje zaštite Rudnika. Njen posao je utoliko teži uzme li se u obzir da vrši kontrolu nad više od dvadeset muških uposlenika. Rad sa muškarcima, kako kaže, ne pada joj teško jer uživa veliki autoritet i uz pravilan pristup probleme riješava vrlo jednostavno.

Posao šefice Službe unutrašnje zaštite preuzela je u julu 2014. godine i od tada unijela brojne promjene zahvaljujući kojima Služba funkcionira bez većih problema. Dobro poslovno vođenje i stručnost temeljna su komponenta uspješnog rada, a toga u ovom slučaju ne nedostaje.

- Moji uposlenici su obučeni i certificirani ljudi spremni u svakom momentu odgovoriti na postavljeni zadatak. Pokrivaju cijelo područje Rudnika, 24 sata na dan, brinući da sigurnost uvijek bude na zadovoljavajućm nivou. Zbog širokog područja i

deficita certificiranih zaposlenika, angažovali smo zaštitarsku agenciju A&M SECURITY, jer ništa ne želimo prepustiti slučaju - u razgovoru nam je rekla Elzina.

Pod kontrolom ove Službe su svi djelovi Rudnika; kopovi, Podzemna eksploatacija, Separacija, centralni i barutni magacin. Pomno se prate osjetljiva područja, koja su uglavnom pokrivena video nadzorom.

Video nadzor imaju Bešin, Jama, Separacija i centralni magacin, što je veliko olakšanje jer se u svakom momentu mogu vidjeti prilazi u ove objekte.

- Mi trenutno u funkciji imamo 54 kamere. Možemo vidjeti sve ulaze u Rudnik i ulaze vozom. Nadziru se i mašinski djelovi utovar i istovar na Separaciji, te parkinzi. Svi video zapisi se arhiviraju na propisani način i pristup njima imaju samo pojedinci - ističe Elzina.

U razgovoru nam je otkrila i planove za neposrednu budućnost. Naime, u ovoj godini planiraju uvesti video nadzor na nove lokacije. Ukoliko sve bude išlo po planu, po prvi put video nadzor dobit će barutni magacin i Direkcija, a vršit će se i rekonstrukcija starog analognog video nadzora u jami.

Problemi s kojima se ova Služba trenutno suočava su sitne krađe. Iako su ranije bile znatno izraženije, uz profesionalni pristup i angažovanost uposlenih svedene su na minimum. Nažalost zbog velikog prostora koji je potrebno pokriti i manjeg broja certificiranih radnika još uvijek su neizbježne. Najčešće su režirane od strane zaposlenika Rudnika u saradnji sa trećim licima.

- Ja imam malo drugačiji pristup kada su u pitanju krađe. Naravno, svako kršenje zakona ove vrste prijavljujemo MUP-u koji pravi službenu zabilješku i sve dižemo na viši nivo. Iako naši radnici za počinjena djela odgovaraju pred disciplinskom komisijom, ja smatram da nema bolje kazne od one narodski rečeno „po džepu“. Mislim da se to pokazalo kao najdjelotvornije - dodala je.

Mišljenja je da uposlenici nisu dovoljno informisani kada je u pitanju Zakon o radu, i da ga olako shvataju neznajući da za prekršaj ovakve vrste mogu dobiti otkaz ugovora o radu, te da bi o tome trebali posebno razmisliti.

Osim što više nego uspješno vodi svoju Službu Elzina je i zastupnica u Parlamentu FBiH, a odnedavno obnaša i funkciju predsjednice Općinskog odbora SDA, što izdvaja kao posebno zadovoljstvo i čast. Smatra da je najvažnije stvoriti uslove da ljudi vjeruju u vas i da vas podržavaju. Po svemu sudeći u tome je uspjela budući da su je upravo građani izabrali za parlamentarca FBiH, a kolege za vođu ubjedljivo prve stranke na Općini.

- Ljudi su me izabrali za svog predstavnika, a ja se svaki dan trudim da to i opravdam. Dobro znam da predstavljam i za svoje postupke odgovaram najjačem Općinskom odboru u državi - kaže Elzina.

Svjesna je odgovornosti koju nosi njen posao ali i spremna na izazove koji se nalaze pred njom, jer kako kaže ima dovoljno strasti i motivacije za velike stvari. Istina je da što više radimo moramo više ulagati u sebe i svoje obrazovanje, pokušati svaki dan naučiti nešto novo jer kratice do uspjeha nema, niti formule kojom bi se mogao zaobići rad.

A rad je nemoguće zaobići ako za mentora imate Mirsada Kukića koga je Elzina naslijedila na vrhu Stranke.

- Čast je naslijediti Mirsada Kukića i Općinski odbor sa preko 80% glasova jedne općine, pogotovo u vrijeme izgradnje najvećih projekata u FBiH. Nadam se da ću se predsjedniku moći odužiti na način da ću Odbor voditi bar upola dobro kao on, a svi znamo da je on to radio bez pogreške. Svjedoci smo uspjeha i snage Banovića koji se cijene i poštuju na prostoru cijele BiH, a sve to zahvaljujući upravo njemu - dodala je.

Na kraju je imala poruku za sve uposlenike Rudnika, pa i sve građane Banovića.

- Pozivam ljude na poštenje i moralne vrijednosti. Treba da shvate da je ovo ruka koja ih hrani, da sve te krađe koje smo ranije spomenuli nisu krađe od drugih nego od svih nas, to je krađa od samih sebe. Moramo malo više cijiniti ovo što imamo. Dovoljno je samo izaći i vidjeti kako ljudi žive i rade u drugim gradovima i preduzećima, vjerujte da nam mnogi zavide - poručila je.

Ništa ne pada s neba, sve se stiče radom i trudom, i onaj ko želi uspjeti na bilo kojem polju mora uložiti makimalan trud, odricati se i biti svjestan da rezultat dolazi mnogo kasnije.





SAFER MUŠANOVIĆ PREDSEDNIK SAMOSTALNOG SINDIKATA RUDARA FBiH

STANDARD RUDARA U BANOVIĆKOM RUDNIKU NA ZADOVOLJAVAJUĆEM NIVOU

Rudarstvo je odavno poznato kao jedno od najtežih i najopasnijih zanimanja. Iz dana u dan rudari su podvrgnuti raznim opasnostima i teškim uslovima rada. U većini rudnika sigurnost zaposlenih je izuzetno loša. Međutim, rudnik „Banovići“ rijedak je primjer onih koji konstantno rade na humanizaciji i modernizaciji ove oblasti, nastojeći da nađu najbolja moguća rješenja za smanjenje opasnosti i rizika. U ovaj Rudnik posljednjih dvanaest godina uloženo je oko 140 miliona KM na osnovu kojih je stvoreno preduzeće koje zaslužuje podršku i poštovanje.

Kakav je standard i koliko su rudari sigurni u rudniku „Banovići“, razgovarali smo sa predsjednikom Samostalnog sindikata rudara FBiH dr. Saferom Mušanovićem. Posebno je zadovoljan uslovima rada u Rudniku koji su nemjerljivi u poređenju sa drugim rudnicima u BiH.

Pokazatelji razvoja i nivoa na kojem se nalazi Rudnik su redovne plate, regres i doprinosi, banjska – klimatska liječenja, ali i konstantna zapošljavanja novih radnika, čime se obezbijeduje egzistencija skoro cijele Općine. U Rudniku je trenutno zaposleno oko 2.900 radnika, koji su u prethodnoj godini ostvarili prosječno mjesečno primanje u iznosu od oko 967 KM, te regres i „višak“.

- Kada govorimo o standardu radnika, mogu reći da je na zadovoljavajućem nivou, ali naravno da uvijek može bolje. Iako imamo odgovarajuće proširenje materijalne osnove rada, mi nastojimo da zaposlimo dodatni broj radnika i time doprinesemo egzistenciji većeg broja građana – istakao je dr. Mušanović.

Kroz razgovor je spomenuo i korektan odnos Sindikata i Uprave Društva, Nadzornog odbora, te predstavnika svih sektora, koji su svoje dugogodišnje iskustvo rada posvetili upravo Rudniku i

njegovom razvoju iskazujući socijalni i ekonomski patriotizam. Ovakvim načinom rada rukovodstvo brine o radnicima, budućim generacijama i cijeloj Općini, stvarajući jedan zavidan privredni razvoj.

- Patriotizam je glavna odlika rukovodstva banovičkog rudnika. Stvorili su prepoznatljivo i dobro organizovano preduzeće, cijenjeno i vrlo uspješno – zadovoljan je predsjednik Sindikata.

Spomenuo je tešku proizvodnu poslovnu godinu, koja je uz organizaciju, strateško razmišljanje i smanjenje troškova, kulminirala pozitivnim efektima na finansijskom i proizvodnom nivou. Takav ishod rudnik „Banovići“ bilježi već dvanaest godina u kontinuitetu, što daje realnu mogućnost za ostvarivanje zacrtanih ciljeva i planiranih investicija.



ODRŽAN SASTANAK PREDsjedNIKA FEDERACIJE BIH MARINKA ČAVARE SA PREDSTAVNICIMA RMU „BANOVICI“ I OPĆINE BANOVICI

NEUPITNA PODRŠKA ZA STRATEŠKE PROJEKTE RUDNIKA

Predsjednik Federacije BiH Marinko Čavara krajem januara boravio je u službenoj posjeti rudniku „Banovići“. Sastanku su prisustvovali Uprava, Nadzorni odbor, pomoćnik direktora za Strateški razvoj Rudnika Mirsad Kukić, te premijer Tuzlanskog kantona Bego Gutić, načelnik Općine Midhat Husić i bliski saradnici.

Cilj posjete bio je predstavljanje rada Rudnika od samog početka poslovanja pa sve do danas, kada je stvoreno jedno respektabilno preduzeće u kome se još uvijek aktivno radi na razvoju i unapređenju. Nepobitni dokazi su i veliki Strateški projekti izgradnje Termoelektrane i Tvornice cementa u Banovićima.

- Ovo je bila jedinstvena prilika da predsjednika gospodina Marinka Čavaru upoznamo sa trenutnim stanjem u preduzeću, ali i sa velikim razvojnim planovima.

Obzirom da smo ušli u značajne projekte i da smo podmakli u fazi njihove realizacije podrška Federalne vlasti nam je itekako bitna - rekao je direktor Rudnika Munever Čerčić.

Pozitivne komentare na trenutno stanje u Rudniku nakon sastanka dao je i predsjednik Federacije.

- Znao sam da je rudnik „Banovići“ uspješno preduzeće, ali nakon razgovora sa direktorom mogu reći da je to firma koja svih ovih godina nije bila u recesiji, koja kvalitetno posluje i ima jasnu viziju za budućnost - u obraćanju novinarima rekao je predsjednik Federacije BiH Marinko Čavara.

Mišljenja je da je najveći teret u sprovođenju Strateških projekata na rukovodstvu Rudnika i njihovim najbližim saradnicima, ali da će realizacija tih projekata donijeti mnogo, prije svega u pogledu razvoja preduzeća, novih radnih mjesta, te proširenja

postojećih kapaciteta. Podrška Federalne vlasti u tome neće izostati.

Ne zaostaje ni podrška Kantonalne vlasti. Premijer TK Bego Gutić rekao je da ovo preduzeće zaslužuje podršku svih nivoa vlasti, samim tim jer sedamnaest godina u kontinuitetu bilježi privredni rast i rast investicionih ulaganja, što u budućnosti donosi nova zapošljavanja i doprinos cijeloj državi.

Nakon radnog sastanka i prezentacije Strateških projekata u prostorijama Direkcije Rudnika, predsjednik Federacije posjetio je i općinu Banovići.



IMPRESUM

**RUDAR informativna novina radnika
RMU "Banovići" d.d. Banovići**

Uređuje redakcioni odbor:

Samir Numanović, predsjednik
Amela Kantić, urednica
Melisa Čaušević, novinar- saradnik
Fertik Glibanović
Amir Halilčević
Salko Gutić
Rasim Užičanin
Šehval Lapandić

DTP i štampa: "OFF SET" Tuzla

Riješenjem Republičkog komiteta
za informacije broj 04-651-537/77
od 6.9.1977.

List je uveden u Registar štampe R BiH.

E-mail: kontakt@rumb.ba
nadzorni.odbor@rumb.ba

www.rmub.ba

Nenamjenski krediti koje svi razumiju. Jer mi nismo sa druge planete!



Priča o kreditima Vam često zvuči kao jezik sa neke druge planete?

Mi govorimo jezikom koji razumijete i uvijek nastojimo slušati Vaše potrebe, te kreirati proizvode koji će Vam pomoći u uspješnom ostvarenju ciljeva.

Upravo zato, pripremili smo novu akcijsku ponudu koja je vrlo jasna, i u kojoj Vam nudimo sve **fiksno!**

Novi nenamjenski kredit u iznosu do 60.000 KM, na raspolaganju Vam je uz fiksnu kamatu i fiksnu ratu, a na sve to, odobravamo Vam i fiksno prekoračenje po tekućem računu!

DO
60.000 KM

NENAMJENSKI KREDITI BEZ HIPOTEKE

- ✓ FIKSNA KAMATA
- ✓ FIKSNA RATA
- ✓ FIKSNO PREKORAČENJE PO TEKUĆEM RAČUNU
- ✓ kamatna stopa već od 7,35% (EKS 9,06%*)
- ✓ rok otplate do 10 godina
- ✓ naknada za obradu kredita već od 1,00%

Iznos u KM/godine otplate	3 godine	4 godine	5 godina	6 godina	7 godina	8 godina	9 godina	10 godina
10.000	310	241	200	172	153	138	127	118
20.000	621	482	399	344	305	276	254	236
30.000	931	723	599	517	458	414	381	354
40.000	1241	964	799	689	611	552	507	472
50.000	1552	1205	998	861	763	690	634	590
60.000	1862	1446	1198	1033	915	828	761	707

* EKS za nenamjenski kredit bez hipoteke izračunata je na iznos od 60.000 KM, period otplate 10 godina, uzimajući u obzir troškove police osiguranja, naknade za održavanje kredita, troškove mjenice i ovjere potrebne dokumentacije.

Uz svaki odobreni kredit u toku akcije, odobravamo Vam i fiksno prekoračenje po tekućem računu, kreditnu karticu i neki od naših Sparkasse Paketa!

Mobilni set usluga.

Poslovanje sa Bankom dostupno gdje Vi želite.

Ukoliko živite u gradu u kojem nema Sparkasse Bank poslovnice, nudimo Vam poseban mobilni set usluga, sa kojim su Vam dostupne osnovne bankarske usluge bez potrebe dolaska u poslovnicu!

Uz jedinstvenu mjesečnu cijenu od samo 5,00 KM, troškovi korištenja ovog seta su znatno povoljniji od plaćanja pojedinačnih proizvoda i usluga po njihovoj redovnoj cijeni.

Proizvodi uključeni u mobilnom setu:

- ✓ tekući račun
- ✓ debitna kartica MasterCard
- ✓ netBanking - usluga internet bankarstva
- ✓ mBanking - usluga mobilnog bankarstva
- ✓ trajni nalog



Za više informacija o akciji, proizvodima iz naše ponude te naknadama koje Vas očekuju njihovim korištenjem, posjetite nas u najbližoj poslovnicu ili pozovite u naš Info centar 033 280 300.

Ponuda vrijedi do 15.04.2016.

Razumijemo se

SPARKASSE BANK